



RL: 256
RECEIVED
16/01/2021

Xafiiska Madaxweynaha

Sum: JSL/XM/WM/222-625/012021

Taar: 02/01/2021

Wareegto Madaxweyne

Dhaqan-galka Wax-ka-beddelka iyo Kaabista Xeerka Maamuuska
Madaxweynaha, Madaxweyne Ku-xigeenka Hore, Guddoomiyaha Golaha
Guurtida, Guddoomiyaha Golaha Wakiillada ee Hore iyo Mudaneyaasha
Baarlamanka Xeer Lr.62/2020

Markaan Arkay: Qodobka 90aad ee Dastuurka Jamhuuriyadda Somaliland;


Markaan Arkay: Qodobka 75aad ee Dastuurka Jamhuuriyadda Somaliland;

Markaan Arkay: Go'aanka Golaha Wakiillada, Go'aan Lr. GW/KF-44/869/2019, ee ku taariikheysan 09/12/2020, ee ay ku ansixiyeen Wax-ka-beddelka iyo Kaabista Xeerka Maamuuska Madaxweynaha, Madaxweyne Ku-xigeenka Hore, Guddoomiyaha Golaha Guurtida, Guddoomiyaha Golaha Wakiillada ee Hore iyo Mudaneyaasha Baarlamanka Xeer Lr.62/2020;

Waxaan soo-saaray;

Dhaqan-galka Wax-ka-beddelka iyo Kaabista Xeerka Maamuuska Madaxweynaha, Madaxweyne Ku-xigeenka Hore, Guddoomiyaha Golaha Guurtida, Guddoomiyaha Golaha Wakiillada ee Hore iyo Mudaneyaasha Baarlamanka, Xeer Lr.62/2020;

Allaa Mahad Leh



Muuse Biixi Cabdi

Madaxweynaha Jamhuuriyadda Somaliland



**Go'aanka Wax-ka-Bedel iyo kaabista Xeerka Maamuuska
Madaxweynaha, M/weyne ku-xigeenka hore, Guddoomiyaha
Golaha Guurtida , Guddoomiyaha Golaha Wakiilada iyo
Mudanayaasha Baarlamaanka Xeer Lr.62/2020**

Golaha Wakiiladu

- Markuu Arkay: -** Qodobka 38aad Faqradiis 1aad, Qodobka 47aad, 65aad, 79aad iyo Qodobka 87aad ee Dastuurka JSL.
- Markuu Arkay :-** In Guddoomiyaha Golaha Guurtida iyo Guddoomiyaha Golaha Wakiiladu ay leeyihiin habmaamuuska 2aad iyo 3aad ee Qaranka sida ku cad Qodobka 93aad ee Dastuurka Dalka
- Markuu ogaaday:-** Kaalinta wax ku-oolka ah ee Madaxweynayaashii iyo Madaxweyne ku xigeenadii hore, iyo Guddoomiyaha Golaha Guurtida iyo Guddoomiyaha Golaha Wakiilada ee hore iyo Mudanayaasha Baarlamaanku ka qaataan hanaanka dib-u dhiska Qaranka JSL.
- Markuu tixgeliyay :-** Soo jeedintii Madaxweynaha JSL ee kaabista iyo wax ka bedelka xeerka maamuuska madaxweynaha iyo madaxweyne ku xigeenkii hore iyo Mudanayaasha Baarlamaanka Xeer Lr. 62/2013.

Markuu Arkay:

Go'aanka Ansixinta Xeer **LR:62/2020** ee Golaha Wakiiladu U Gudbiyeen Golaha Guurtida JSL Kuna taariikhsanayd **02/12/2020**.

Markuu Arkay:

Go'aanka Ansixinta Xeer **LR:62/2020** ee Golaha Guurtida JSL kuna Taariikhsanayd **09/12/2020**.

Markuu Arkay:

In Golaha Guurtida wax-ka-bedel iyo kaabis ayna ku sameyn kuna ansixiyeen sagaal iyo afartan **(49)** cod Wax-Ka-Bedel Iyo Kaabista Xeerka Maamuuska Madaxweynaha, Madaxweyne Ku Xigeenka Hore, Guddoomiyaha Golaha Guurtida , Guddoomiyaha Golaha Wakiilada Ee Hore Iyo Mudanayaasha Baarlamaanka Xeer Lr **.62/2020**

Wuxuu

Cod aqlabiyad ah oo shan iyo labaatan **(25 cod)** oo gacan taag ah ku Ansixiyay Wax-Ka Bedel Iyo Kaabista Xeerka Maamuuska Madaxweynaha, Madaxweyne Ku Xigeenka Hore, Guddoomiyaha Golaha Guurtida , Guddoomiyaha Golaha Wakiilada Ee Hore Iyo Mudanayaasha Baarlamaanka Xeer Lr **.62/2020**

ALLAA MAHAD LEH

C/risaaq Siciid Ayaanle
Xoghayaha Guud ee G/Wakiilada JSL



Baashe Maxamed Faarax
Guddoomiyaha Golaha Wakiilada JSL.

JAMHUURIYADA SOMALILAND



**Wax-Ka Bedel Iyo Kaabista Xeerka Maamuuska Madaxweynaha,
Madaxweyne Ku Xigeenka Hore, Guddoomiyaha Golaha Guurtida,
Guddoomiyaha Golaha Wakiilada Ee Hore Iyo Mudanayaasha
Baarlamaanka Xeer Lr 62/2020**



GOLAHA WAKIILLADA JSL

Markuu Arkay:- Qodobka 38aad Faqradii 1aad, Qodobka 47aad, 65aad, 79aad iyo Qodobka 87aad ee Dastuurka JSL.

Markuu Arkay:- in Guddoomiyaha Golaha Guurtida iyo Guddoomiyaha Golaha Wakiiladu ay leeyihiin habmaamuuska 2aad iyo 3aad ee Qaranka sida ku cad Qodobka 93aad ee Dastuurka Dalka.

Markuu ogaaday:- Kaalinta wax ku-oolka ah ee Madaxweynayaashii iyo Madaxweyne ku xigeenadii hore, iyo Guddoomiyaha Golaha Guurtida iyo Guddoomiyaha Golaha Wakiilada ee hore iyo Mudanayaasha Baarlamaanku ka qaataan hanaanka dib-u dhiska Qaranka JSL.

Markuu tixgeliyay:- Soo jeedintii Madaxweynaha JSL ee kaabista iyo wax ka bedelka xeerka maamuuska madaxweynaha iyo madaxweyne ku xigeenkii hore iyo Mudanayaasha Baarlamaanka Xeer Lr. 62/2013.

Wuxuu Ansixiyey

Wax-Ka-Beddelka iyo Kaabista Xeerka Maamuuska Madaxweynaha, Madaxweyne Ku-xigeenka Hore, Guddoomiyaha Golaha Guurtida, Guddoomiyaha Golaha Wakiilada ee Hore iyo Mudanayaasha Baarlamaanka Xeer Lr. 62/2020.



Qodobka 1^{aad}
Magaca Xeerka.

Xeerkan waxa loogu yeedhayaa Wax-Ka-Beddelka iyo Kaabista Xeerka Maamuuska Madaxweynaha, Madaxweyne Ku-xigeenka Hore, Guddoomiyaha Golaha Guurtida iyo Guddoomiyaha Golaha Wakiilada ee Hore iyo Mudanayaasha Baarlamaanka Xeer Lr. 62/2020.

Qodobka 2^{aad}
Erey Bixinta.

Xeer-dejinta (Baarlamaan):-.	waxa loola jeedaa Baarlamaanka JSL oo ka kooban labada aqal ee kala ah (Golaha Guurtida iyo Golaha Wakiilada)
Mudane:-	waxaa loo jeedaa xubin ka tirsan Golaha Guurtida ama Golaha Wakiilada JSL.
Gunno-Sagootis:-	waxa loola jeedaa mushaharka iyo gunnada billaha ah ee wada socda ee Mudaneyaasha Baarlamaanka.
Gunno Maamuus:-	waxa loola jeeda qadarka lacagta ah ee la siinayo madaxweynayaashii, Madaxweyne ku-xigeenadii hore iyo Guddoomiyaha Golaha Guurtida iyo Guddoomiyaha Golaha Wakiilada ee Hore ee hada jooga iyo kuwa ka dambeeya marka ay xilka ka dagaan.
Madaxwayneha hore:-	Waxa loola jeedaa Masuul kasta oo xilka madaxwayne ka qabtay Somaliland intay jirtay.
Madaxweyne ku xigeen hore:-	Waxaa loola jeedaa Masuul kasta oo xillka Madaxwayne ku-xigeen ka qabtay Somaliland intay jirtay.
Guddoomiyaha Golaha	Waxa loola jeedaa masuul kasta oo xillka



Guurtida hore:-

Guddoomiyaha Golaha
Wakiilada hore:-

Guddoomiyaha Golaha Guurtida ka haya hada iyo kuwa uga dambeeyaa marka ay xilka wareejiyaan

Waxa loola jeedaa masuul kasta oo xillka Guddoomiyaha Golaha Wakiilada Qofkastoo xillka Guddoomiyaha Golaha Wakiilada ka haya hada iyo kuwa uga dambeeyaa marka ay xilka wareejiyaan.

Qodobka 3^{aad}
Dhawrsanaanta

Madaxweynaha, Madaxwayne ku-xigeenka hore, Guddoomiyaha Golaha Guurtida iyo Guddoomiyaha Golaha Wakiilada ee hore waxay leeyihiin dhawrsananta sharci ee ay leeyihin mudanayaasha baarlamaanka, waxayna ku waayi karaan haddii maxkamad ay ku rido xukun kama danbays ah oo ciqaabtiisu aanay ka yarayn saddex (3) sanadood.

Qodobka 4^{aad}
Xuquuqda Hoyga

Madaxweynaha, Madaxwayne ku-xigeenka hore, Guddoomiyaha Golaha Guurtida iyo Guddoomiyaha Golaha Wakiilada ee hore waxay xaq u leeyihiin:

1. In dawladdu siiso hoy ku habboon oo ah guri dawladeed isla markaana ah kiro bilaash ah (free rent) inta ay nool-yihiin iyaga iyo xaasaskoodu ama ka ugu yar caruurtoodu ay ka gaadhayaan da'da 18 jir.
2. In ay dawladdu u dayac tirto hoyga iyadoo la raacayo nidaamka dayactirka guryaha dawladda.
3. Madaxweynaha, Madaxwayne ku-xigeenka hore, Guddoomiyaha Golaha Guurtida iyo Guddoomiyaha Golaha Wakiilada ee hore Xuquuqda ku xusan Faqrad 1aad ee Qodobkan ma iibinkaraan, ma wareejin wareejin karo, ma hibayn karaan mana kirayn karaan, umana isticmaali karaan sifo sharci-daro ah.
4. In la siiyo midkiiba hal gaadhi, hal dareewal, Laba shaqaale, 3 ciidan ah oo ilaaliya nabadgalyadooda iyaga iyo guryahoodaba kuwaas oo kharashkooda dawladu bixinayso.



Qodobka 5^{aad}
Gunnada Maamuuska

1. Madaxweynaha, Madaxwayne ku-xigeenka hore, Guddoomiyaha Golaha Guurtida iyo Guddoomiyaha Golaha wakiilada ee hore waxay leeyihiin (25% Boqolkiiba shan iyo labaatan) mushahar la mid ah ka ku xusan xeerka mushaharka Madaxweynaha iyo Madaxwayne ku-xigeenka (Xeer Ir. 46/2010) iyo xuquuqda ay ku helaan xubin sharafeednimada Golaha Guurtida.
2. Haddii Madaxweynaha, ama Madaxwayne ku-xigeenka hore, Guddoomiyaha Golaha Guurtida iyo Guddoomiyaha Golaha wakiilada ee hore geeriyi ku timaado waxay marwooyinkooda iyo caruurtoodu yeelanayaan (12.5% boqolkiiba laba iyo toban iyo badh) mushaharka ku xusan faqrada 1aad ee qodobkani,
3. Haddii marwada ama marwooyinka Madaxweynaha, Madaxwayne ku-xigeenka hore, ama Guddoomiyaha Golaha Guurtida iyo Guddoomiyaha Golaha wakiilada ee hore ay geeriyi ku timaado waxaa caruurtooda loo sii wadayaa (12.5% boqolkiiba laba iyo toban iyo badh) mushaharka ku xusan faqrada 1aad ilaa inta ilmaha ugu yari ka gaadhayo 18 sano jir.

Qodobka 6^{aad}
Xilliga bilowga Gunnada

1. Waxa Madaxweynaha ama Madaxwayne ku-xigeenka hore ama Guddoomiyaha Golaha Guurtida iyo Guddoomiyaha Golaha wakiilada ee hore gunnada looga bilaabaya marka ay xillka wareejiyaan.
2. Madaxweynaha iyo Madaxwayne ku-xigeenka hore iyo Guddoomiyaha Golaha Guurtida iyo Guddoomiyaha Golaha wakiilada ee hore ee intaan Xeerkani dhaqan galin xillka ka degay waxa Gunnada looga bilabayaa ka dib marka uu Xeerkani dhaqan galo.

Qodobka 7^{aad}
Kharashka caafimaadka

Haddii madaxweynaha ama Madaxwayne ku-xigeenka hore ama Guddoomiyaha Golaha Guurtida iyo Guddoomiyaha Golaha wakiilada ee hore ay soo food saarto xaalad caafimaad daro oo gudidda dhakhatiirta Qaranku



ku taliyaan in cusbitaal dibadeed loo diro, waxaa kharashka caafimaad bixinaya xukuumadda.

Qodobka 8^{aad}

Reebanaanta

Xuquuqda u Xeerkani jideeyey waxa ka reeban in la siiyo Madaxweynaha iyo Madaxweyne ku-xigeenka hore ama Guddoomiyaha Golaha Guurtida iyo Guddoomiyaha Golaha wakiilada hore ee xillka lagaga qaaday maamus ka xayubinta Dastuuri ah.

Qodobka 9^{aad}

Geeridda iyo u Samaynta Aas Qaran

Haddii ay geeri ku timaado Madaxweynaha, Madaxwayne ku-xigeenka hore, Guddoomiyaha Golaha Guurtida iyo Guddoomiyaha Golaha wakiilada ee hore, waxaa loo samaynayaa aas Qaran.

Qodobka 10^{aad}

Hab-Maamuuska Mudaneyaasha Baarlamaanka

- 1) Mudanayaasha Baarlamaanka looma diidi karo gelida xafiisyada dawladda iyo meel kasta oo ay shaqo qaran ka socoto marka ay gudanayaan xilkooda iyo waajibadkooda dastuuriga ah.
- 2) Waa waajib in hay'addaha iyo Wasaraddaha Qaranku siiyaan xog-ramsi ah oo run ah Gudi-hosaadyadda Golayaasha iyo Mudanayaasha loo igmado xill-gudasho.
- 3) Cid kasta oo ka hortimaado xeerkan ama meel kaga dhacda sharafta mudane ama xayirta xilka uu gudanaayo waxaa lagu cigaabayaa si waafaqsan Xeerka Cigaabta Guud ee ah dambiyada laga galo hawl-wadeen Qaran.
- 4) Waxaa waajib ku ah dhamaan shaqaalaha Dawladda, Ciidamadda Qaranka iyo cidii kale ee hawl qaran looga baahdo inay u fududeeyaan gudashada xilkooda.



Qodobka 11aad

Mushaharka iyo Gunnada Sagootiska ah Mudanayaasha Baarlamaanka

- 1) Mudanayaasha Baarlamaanka ee dhammaysta muddo-xileedka dastuuriga ah waxaa la siinayaa mushahar iyo gunno sagootis ah oo dhan hal sanno oo mushahar iyo gunno wada socda ah, sida ku xusan madax-xigaha mushaharka iyo gunnooyinka miisaaniyada qaranka ee labada Gole Baarlamaan ee 2110105 (Mushaharka Xildhibaanada Xeer-dejinta) iyo 211303 (Gunno-hawleed)
- 2) Mushaharka iyo gunnada ku xusan faqradda 1aad ee qodobkan waxaa xaq u yeelanaya mudanayaasha baarlamaanka ee muddo-xileedkoodu socdo iyo kuwa ka danbeeya
- 3) Mushaharka iyo gunnada ku xusan faqradda 1aad ee qodobkan, wasaaradda maaliyaddu waa inay ku bixisaa saddex bilood gudahood marka lagu dhawaaqo natiijada doorashada baarlamaanka cusub.

Qodobka 12aad

Daryeelka Caafimaadka Mudanayaasha Baarlamaanka

Mudanayaasha Baarlamaanku waxay xaq u leeyihiin inay helaan xanaano caafimaad oo la mid ah ta ku xusan Qodobka 7aad ee Xeerkan.

Qodobka 13aad

Adeegsiga Xeerka

Xeerkan waxaa lagu dhaqayaa Madaxweynaha, Madaxweyne ku-xigeenadda hore, Guddoomiyaha Golaha Guurtida iyo Guddoomiyaha Golaha wakiilada ee hore, iyo Mudanayaasha baarlamaanka ee maanta fadhiya iyo kuwa ka danbeeya.



**Qodobka 14^{aad}
Tir-tiridda**

Waxaa la tir-tiray Wax Ka-beddelka Xeerka Maamuuska Madaxweynaha, Madaxweyne Ku-xigeenka Hore iyo Mudanayaasha Baarlamaanka ee Xeer Lr. 62/2013, ama Qodobkasta oo ka hor imanayaa xeerkan, laguna jideeyey xuquuqda Madaxweynaha iyo Madaxweyne ku-xigeenka hore iyo Mudanayaasha Baarlamaanka.

**Qodobka 15^{aad}
Dhaqan-galka**

Xeerkani wuxuu dhaqan gelayaa marka labada Gole ee Xeerdejintu ansixiyaan Madaxweynuhuna saxeexo faafinta rasmiga ahna ku soo saaro.

Cabdirisaaq Siciid Ayaanle
Xoghayaha Guud ee Golaha Wakiilada



Baashe Maxamed Faarax
Gudoomiyaha Golaha Wakiilada JSL